

Akcija SIPA u Odžaku

UHAPSENI NEKADASNJI PRIPADNICI HVO-a

Marijan Brnjić, Martin Barukčić, Ilija i Pavo Glavaš terete se za silovanja i mučenja žrtava srpske nacionalnosti tokom 1992. godine

Zbog sumnje da su počinili ratni zločin protiv civilnog stanovništva, pripadnici Agencije za istrage i zaštitu BiH (SIPA) jučer su uhapsili Marijana Brnjića (1966), Martina Barukčića (1965), te Iliju (1968) i Pavu Glavaša (1961), svi iz Odžaka.

Upravnik logora

Hapšenje je izvedeno po nalogu Tužilaštva BiH, a osumnjičeni se terete da su djelo počinili nad žrtvama srpske nacionalnosti na području općine Odžak tokom 1992. godine. Uhapšeni su privedeni u Tužilaštvo, gdje će biti saslušani, a naknadno će biti odlučeno da li će im biti predložena mjera pritvora.

Brnjić, Barukčić i Glavaši se, kako saznajemo, terete da su djelo počinili kao nekadašnji pripadnici 102. brigade Hrvatskog vije-



Osumnjičeni privedeni na saslušanje u Tužilaštvo BiH

ća obrane Odžak, od juna do augusta 1992. godine. Na teret im se stavlja i silovanje nekoliko žrtava, žena srpske nacionalnosti sa područja Odžaka. Prema podacima koje je agencija Srna objavila još prije dvije godine, Brnjić je bio jedan od upravnika odžačkog

logora, a neke od žrtava su upravo njega dovodile u vezu sa spomenutim silovanjima. Srna je tada objavila i to da Udruženje logoraša Odžak 92 posjeduje dokumentaciju da su pripadnici jedinice Vatrene konji, a koja je djelovala u sastavu 102. odžačke brigade,

silovali Srkinje u logorima u Odžaku i u selu Novi Grad.

Postupak protiv Tolića

Inače, u Sudu BiH trenutno se vodi postupak protiv nekadašnjeg pripadnika 102. odžačke brigade HVO-a Josipa Tolića, a koji se tereti da je od maja do oktobra 1992. godine učestvovao u zlostavljanju zarobljenika srpske nacionalnosti na području Odžaka i Bosanskog Broda. Isti sud je Albinu Terzić, nekadašnju pripadnicu Vojne policije HVO-a, osudio na tri godine zatvora zbog ratnog zločina protiv civilnog stanovništva. Zbog zločina počinjenog u logorima u Odžaku, pravosnažno je osuđen i Ferid Halilović i to na 15 godina zatvora. Nekoliko mjeseci nakon što je pušten na uslovnu slobodu, Halilović je preminuo. **A. B. Č.**